



I.A.B.N.A.

Islamic Association of Bosniaks of North America
Islamsko Udruženje Bošnjaka Sjeverne Amerike

25. maj 2003., St. Louis, Missouri, USA

REZOLUCIJA

Na 8. susretima Bošnjaka Sjeverne Amerike, održanim u St. Louis, Missouri, 25. maja 2003. godine, odnosno 24. rebiul-evvela 1424. hidžretske godine, Islamska Asocijacija Bošnjaka u SAD – IABNA, usvojila je slijedeću rezoluciju:

Bismillahir-Rahmanir-Rahim

BEZ UVEZANOSTI U SVOJ DŽEMAT I ZAJEDNICU, BOŠNJACI U DIJASPORI SU BEZ OPREDJELJENJA, A NEOPREDJELJENOST JE STANJE BESKONAČNE OPASNOSTI

Jedna od važnijih konsekvenci tragedije od 11. septembra 2001. godine je to što su muslimani, kao uostalom i pripadnici drugih religija ranije, počeli preispitivati svoje veze sa zemljama porijekla uvezujući se sve više i snažnije u američke islamske institucije. Veze sa arapsko-islamskim svijetom su se pokazale ne samo nedjelotvornim već i krajnje destruktivnim tako da su muslimani koji žele nastaviti živjeti u SAD počeli shvatati da su dio američkog društva i da se prema toj činjenici konačno moraju početi određivati. U tom kontekstu trebamo razumijevati i poziciju muslimana iz naše nam Bosne i Hercegovine. Pripadnicima Islamske zajednice Bošnjaka u SAD niko do sada nije zamjerao zbog veza sa BiH i nadamo se da to neće biti slučaj i ubuduće i dok te veze ne budu ugrožavale nacionalnu sigurnost SAD, što do sada nije bio slučaj. Naš čovjek je platio visoku cijenu da bi konačno shvatio *da ništa nije moguće bez čovjeka, ali da ništa nije trajno bez institucija*. Shodno tome i pod geslom "jaka dijaspora, jaka domovina" džemati bošnjačke dijaspore, kao najrelevantnije institucije bošnjačke dijaspore, i najefektivniji tradicionalni način organiziranja, *odlučili su susresti se sa realnošću i*

sudbinu nekih možda 250 000 koji su se sticanjem poznatih okolnosti našli u Americi i Kanadi, uzeti u svoje ruke, i na taj način koliko je moguće, spriječiti prijetuću asimilaciju, ateizaciju i svaki vid propadanja.

Uzimajući u obzir **radikalne promjene koje su uslijedile nakon 11 sep. 2001**, čije posljedice se najdirektnije odražavaju na sve muslimane SAD, uključujući Bošnjake, surovu **realnost**, da najveći broj Bošnjaka koji su nastanjeni u SAD, i pored velikih želja za, jednog dana, povratkom u Bosnu, ipak, razmišljaju u pravcu, ostanka i organiziranja života ovdje u SAD, zatim općenitu **nezainteresiranost matične zemlje**, a naročito indiferentnost njenih relevantnih institucija svih Bošnjaka da se pomogne Bošnjacima u dijaspori da se što bolje organiziraju i ostvare sva svoja građanska a naročito vjerska prava i privilegije koja ih sljeđuju kao vjersku zajednicu i na bazi islamskih principa *u duhu mjesta i vremena* kroz uvezivanje i jačanje postojećih, pomoći pri formiranju novih džemata i **pružiti nadu** u svjetliju budućnost nase dijaspore, na svjetlo dana izašla je Islamska Asocijacija Bošnjaka Sjeverne Amerike - IABNA. Dakle, u nazivu nema «*mešihata*», što bi podrazumijevalo neko čvršće ustrojstvo. Ta riječ je zamijenjena sretnijim terminom «*asocijacija*», što podrazumijeva udruživanje na slobodnoj ili kako je istaknuto u toku rada skupštine – labavoj osnovi - što i jeste u skladu sa demokratskim tradicijama SAD i Kanade, a što nije daleko ni od islamskoga koncepta udruživanja na vjerskoj osnovi.

Asocijacija je formirana između ostalog da omogući bolju suradnju sa Rijasetom putem dijaloga. Odnosi su se dosada sa Rijasetom održavali na principu davanja naloga, dekreta, rješenja, razrješenja, uzimanja zekata, kurbanskoga mesa i sl. Mi smatramo da je to samo jedan od načina dobrog rada, a nikako najboljega. Tamo gdje nema dijaloga, ima ucjena i nametanja. Takav rad kad tad stvori krizu koja zajednicu potom redovno vraća nazad i poništava veliki dio postignutoga. Glavni razlog formiranja Asocijacije nije da se zaoštravaju odnosi sa Rijasetom. Glavni su razlozi proizišli iz potrebe da se IZ-a brže i uspješnije razvija u zemljama koje nude ogromne mogućnosti samoorganiziranja. Kada to bude postignuto, bit će svima bolje. I Islamskoj zajednici u BiH a pogotovo Bošnjacima, njih oko 250,000 u Sjevernoj Americi.

Predsjednik Upravnog odbora Islamske
Asocijacije Bošnjaka u SAD i Kanadi

Bajram Mulić